

四庫全書

史部

欽定四庫全書

史部

山西通志卷二

詳校官監察御史_臣查善長

檢討_臣德生覆勘

總校官進士_臣朱鈴

校對官助教_臣羅萬選

謄錄監生_臣吳集鏞

欽定四庫全書

山西通志卷二

星野

昔庖犧觀象察法黃帝創受河圖始定星傳高陽命
南正重司天北正黎司地帝嚳式序三辰而唐虞羲
和紹軌遂定古今厯象之宗有夏昆吾紹德遂定古
今正朔之宗至於殷有巫咸晉有卜偃趙有尹臯魏
有石申以暨李業興馬重績劉義叟之屬三晉人士

工言天文者衆矣

國家億萬年洪基厯法能杜歲差里差之隙尤密於前
代昔龍門司馬談父子著天官書星野亦天官之支
流也志星野

總論

周禮正義天度云東方七宿七十五度南方七宿百一
十二度西方七宿八十度北方七宿九十八度四分度
之一四方三百六十五度四分度之一度二千九百三

十二里二十八宿間相距積百七萬九百二十三里徑三十五萬六千九百七十里

晉志馬續云天文在圖籍昭昭可知者經星常宿中外官凡一百一十八名積數七百八十三皆有州國官宮物類之象張衡云文曜麗乎天其動者有七日月五星是也日者陽精之宗月者陰精之宗五星五行之精衆星列布體生於地精成於天列居錯峙各有攸屬在野象物在朝象官在人象神其以神差有五列焉是為三

十五名一居中央謂之北斗四布於方各七為二十八舍日月運行歷示吉凶五緯躔次用告禍福中外之官嘗明者百有二十四可名者三百二十為星二千五百微星之數蓋萬有一千五百二十庶物蠢蠢咸得繫命不然何得總而理諸後武帝時太史令陳卓總甘石巫咸三家所著星圖大凡二百八十三官一千四百六十四星以為定紀

隋志總有二百五十四官一千二百八十三星并二十八宿及輔官附坐一百

八十二星總二百八十三官一千五百六十五星

洛書甄耀度周天三百六十五度四分度之一夫一度為千九百三十二里則天地相去六十七萬八千五百

里

日一行一度月一日行十三度十九分度之一也

皇甫謐帝王世紀周天三百六十五度四分度之一一度二千九百三十二里分為十二次一次三十度三十二分度之十四各以附其七宿間距周天積百七萬九百一十三里經三百十五萬六千九百七十一里

周禮大司徒以土宜之灋辨十有二土之名物以相民

宅而知其利害 註十二土分野十二邦上繫十二次
各有所宜也相占視也 疏案保章氏以星土辨九州
之地註云星土星所生土也又云大界則曰九州州中
諸國之封域於星亦有分焉其書亡矣堪輿雖有郡國
所入度非古數也今其存可言者十二分之次也星紀
吳越也元枵齊也娵訾衛也降婁魯也大梁趙也實沈
晉也鶉首秦也鶉火周也鶉尾楚也壽星鄭也大火宋
也析木燕也天有十二次日月之所躔地有十二土王

公之所國凡繫星之法皆因王者所命屬焉昭元年左傳云后帝遷閼伯於商丘主辰商人是因故辰為商星遷實沈於大夏主參唐人是因又云成王滅唐而封太叔焉故參為晉星紫元命苞云國君王者封土應列星之位註云若角亢為鄭房心為宋比其餘小國不中星者以為附庸若然附庸不繫星其餘皆繫星也

史記天官書角亢氐兗州房心豫州尾箕幽州斗江湖牽牛婺女揚州虛危青州營室至東壁并州奎婁胃徐

州昂畢冀州觜觿參益州東井與鬼雍州柳七星張三
河翼軫荊州

漢地理志秦地於天官東井與鬼之分埜也其界自弘
農故關以西 魏地觜觿參之分埜也其界自高陵以
東盡河東河內 周地柳七星張之分埜也自柳三度
至張十二度謂之鶉火之次周之分也 趙地昂畢之
分埜趙分晉得趙國西有太原定襄雲中五原上黨上
黨本韓之別都也遠韓近趙後卒降趙皆趙分也 燕

地尾箕分埜也西有上谷代郡雁門

雁門於天文別屬燕

皇甫謐帝王世紀自胃七度至畢十一度曰大梁之次於辰在酉謂之作噩於律為姑洗斗建在辰今趙分野自畢十二度至東井十五度曰實沈之次於辰在申謂之渚灘於律為仲呂斗建在巳今晉魏分野

隋地理志周禮職方氏正西曰雍州上當天文自東井十度至柳八度為鶉首於辰在未得秦之分野 豫州自柳九度至張十六度為鶉火於辰在午周之分野屬

三河 冀州於古堯之都也舜分州為十二冀州析置幽并其於天文自胃七度至畢十一度為大梁屬冀州自危十六度至奎四度為娵訾屬并州自柳九度至張十六度為鶉火屬三河則河內河東也准之星次本皆冀州之域帝居所在故其界尤大至夏廢幽并入焉

是豫

州亦隸冀州分野也

明一統志太原府禹貢冀州之域天文參井分野 平陽府禹貢冀州之域天文觜參分野 大同府禹貢冀

州之域虞周屬并州天文昴畢分野 潞安府禹貢冀

州之域天文參井分野 汾州府禹貢冀州之域天文

參分野 遼州禹貢冀州之域天文參井分野 澤州

禹貢冀州之域天文觜參分野

沁州古上黨郡地

圖書編山西諸郡太原參井分野平陽觜參分野潞安
參井分野汾州參分野大同昴畢分野澤州觜參分野
遼州參井分野沁州參井分野是山西諸郡三觜參四
參井惟大同一為昴畢也

宋中興天文志天之有度也猶地之有里也二十八宿所分之度猶九州列縣所占之里也曰二十八宿之度或濶狹何也曰日之所躔偶與此宿相當此濶狹於是分也故說渾天者曰日之所躔或多或寡適當其星者凡二十八故度之多寡於是生焉井斗之舍非無星也然不與日躔相當故其度不得不濶觜鬼之傍非無星也然日躔一二日而其星適與相當故其度不得不狹也夫其得度濶狹非舉一宿全體盡占此度也

沈氏筆談予編校昭文書時預詳定渾天儀官長問予二十八宿多者三十三度少者止一度如此不均何也予對曰天事本無度推厯者無以寓其數乃以日所行分天為三百六十五度有奇

日平行三百六十五日有餘而一暮天故以一日為

一度也

既分之必有物記之然後可窺而數於是以度度

之星記之循黃道日之所行一期當者止二十八宿星

而已

度如傘櫟當度謂正當傘櫟上者故車蓋二十八弓以象二十八宿

今所謂距度星

者是也非不欲均也黃道所由當度之星止有此而已

劉知幾曰兩曜日星麗於天象非如九州萬國廢置無常故海田可變而景緯無易

羅泌星野說費直書十二篇以易卦配地域蔡邕月令章句以節氣當國分及皇甫謐作帝王紀復以月律配入辰次或以古受封之日歲星所在為說晉文即位歲受寶沈董因所云寶沈之虛晉人是居春秋戰國地每遷變三晉未分晉果何分秦拔西河魏當何屬周既東西何都而直鶉火陳滅於楚何自而入韓分前封

後據豈得如康成之所謂同時而當星次哉要以九州之分為正

兩鎮三關志分野說嘗考分野之說有屬之五星者有主之七星者有配之支幹者有合之節氣者屬之五星者曰辰為燕趙蓋辰水星司北方治元冥之區故其屬如此主之七星者曰斗樞主冀州之域又曰斗第八星主幽州常以五寅日候之庚寅為上谷代郡蓋帝張四維運之以斗月徙一辰復返其所故其主如此配之以

支幹者曰壬燕趙癸北塞又曰亥燕代蓋運數從天年數從地日數從天星數從地從天用幹從地用支支幹相配乃成二貞其支幹復如此合之節氣者蓋周天三百六十五度四分之一分為十二次日月之所躔也每次三十三度三十三分之十四日至其初為節至其中為中氣其節氣復如此夫天有四舍地有四方四舍成四象四方成四維象者青龍朱雀白虎元武也維者抱德背陽常羊號通也舍有分次方有正隅皆一定而不

可移者故分野以次定之亦本之天象方域之自然者耳辰主燕趙固一說也然辰者太一之精與歲星熒惑鎮星太白共為五緯所以紀綱羣星扶理百精匡輔化機者也經星靜緯星動惟動故其出入宿次比附日月進退離合伏逆遲留可以算數推難以法象求也執之以主燕趙隘矣配之支幹合之節氣又一說也殊不知歲遷六日終而復始子母生尅更迭其宮斗杓為小歲咸池為太歲迎背左右辱強衰昌此又術家之小數其

四正四鈞之算雖明而五官六府之職未備執而論之又
不失之泥也乎孟子曰天之高也星辰之遠也苟求其故
千歲之日至可坐而致也於戲論天象者亦惟求其故而已


二十八舍

雍州梁州水旺冬曰辰星主北嶽內分紫微太微天市
三垣分焉外分四維東則角亢氐房心尾箕北則斗牛
女虛危室壁西則奎婁胃昂畢觜參南則井鬼柳星張

翼軫列為二十八宿而十二辰分焉三垣二十八宿與
天並運一定不移為經星日月金木水火土七曜運行
於列宿無定在為緯星垣宿布其經日月五星運其緯
經緯錯落凡星布列其中天之文見矣三垣曰天市明
堂位天子巡狩之居歲臨之太微朝廷位聽政之居日
臨之紫微宮寢位燕息之居朝夕在焉七曜必遵黃道
歷天街歲一受事於太微而出猶大臣受命天子之朝
以行其職二十八宿分列四方各守其野率諸經星以

共紫微之帝猶郡國百司各治其職安其民人以承天子

昴宿圖



丹元子步天歌

七星一聚實不少阿西月東各一星月下五黃天陰名
陰下六鳥芻藁營營南十六天苑形河裏六星名卷舌
舌中黑點天讒星礪石舌旁斜四丁

占候

昴十一度下為日月中道天之耳目也主西方主獄事
又為旄頭甘氏云主口舌奏對若明大則君無佞臣天
下安和張衡云昴明則獄訟平天阿一星在胃東月一

星在昴東皆黑星又曰天阿主察山林妖變天陰五星
在畢柄西主從天子弋獵之臣天苑十六星在昴畢南
如環狀天子之苑囿養禽獸之所也主馬牛羊明則馬
牛羊盈芻藁六星在苑西以供牛馬之食也一曰天積
天子之藏府也星盛則歲豐穰卷舌六星在昴北天讒
之外主口語以知讒佞張衡云主樞機曲而靜則賢人
用天讒一星在卷舌中主醫巫占與從官同礪石四星
在五車北主磨礪鋒刃

躔度

宋兩朝天文志昴七星距西南星去極七十度 天阿
一星去極六十六度入胃宿十度 月一星去極七十
一度半入昴宿五度 天陰五星距西星去極七十五
度半入胃宿七度 天苑十六星距東北星去極一百
七度半入昴宿七度半 芻藁六星距西行中星去極
一百八度入婁宿十一度 卷舌六星去極五十三度
入昴宿初度 天讒一星去極六十一度半入昴宿半

度 礪石四星距南第二星去極六十五度入昴宿六度

唐志昴十一度

宋志昴宿漢永元銅儀昴宿十二度唐開元游儀十一度舊去極七十四度景祐測驗昴宿十一度距西南星去極七十一度

晉志天阿卷舌天讒俱屬天市垣天苑在二十八宿之外芻藁天阿月礪石晉志不載隋史有之武密又

以芻藁屬胃卷舌屬胃又屬昴乾象新書以芻藁屬
婁卷舌西三星屬胃東三星屬昴天苑西八星屬胃
南八星屬昴步天歌以上諸星皆屬昴宿互有不合
金志赤道宿度昴十一度少黃道宿度昴十一度
漢洛下閎測昴十一度 唐一行測昴十一度 宋
皇祐測昴十一度 元豐測昴十一度 崇寧測昴
十一度少 元郭守敬測昴十一度三十分

漢天文志昴畢冀州

漢志占於街北昴主之

晉志昴畢趙冀州


春秋元命苞昴畢間為天街散為冀州分為趙國
長平之戰太白食昴

欽定四庫全書



卷二

畢宿圖



丹元子步天歌

恰似瓜叉八星出附耳畢股一星光天街兩星畢背旁
天節畢下八烏幢畢上橫列六諸王王下四阜天高星
節下團圓九州城畢口斜對五車口車有三柱任縱橫
車中五個天潢精潢畔咸池三黑星天關一星車腳邊
參旗九個參車間旗下直建九旂連旂下十三烏天園
九旂天園參腳邊

占候

畢十七度主邊兵主弋獵其大星曰天高一曰邊將星
明大則遠夷來貢天下安甘氏云畢主街巷陰雨天之
雨師也明而定則天下安張衡云畢為天馬昂畢間二
星曰天街三光之道也主伺候關梁又云主國界附耳
一星在畢下天高東南隅主聽得失伺愆邪察不祥天
節八星在畢南主使臣之所持也宣威德於四方明則
吉諸王六星在五車南天漢之中主宗社藩屏王室也
明則諸侯奉上天下安天高四星在參旗西北近畢比

臺榭之高主遠望氣象五車五星三柱九星共十四星
在畢東北五車主天子五兵張衡云天子兵車舍也西
北曰天庫主太白秦也次東北星曰天獄主辰星燕趙
也次東南星曰天倉主歲星衛魯也中央星曰司空主
鎮星楚也次西南星曰卿主熒惑魏也五星有變各以
其所主而占之三柱一曰三泉一曰休一曰旗五星均
明柱皆具即人倉廩實五車三柱有變各以其國占之
天潢五星在五車中主河梁濟度之處也咸池三星在

五車中天潢南魚圓也天關一星在五車南畢西北亦曰天門日月五星所行之道也主邊塞事主關閉參旗九星在參西五車之間天旗也明而希則邊寇不動隋志參旗一曰天旗一曰天弓主司弓弩之張候變禦難玉井西南九星曰九游天子之旗也主邊軍進退天苑之南十三星曰天園植果菜之所也曲而鉤則果菜熟

躔度

宋兩朝天文志畢八星距右股第一星去極七十五度

天街二星距南星去極七十一度入昴宿十度 附
耳一星去極七十七度入畢宿三度 天節八星距北
星去極八十度半入畢宿三度 諸王六星距西星去
極七十度入畢宿三度 天高四星距東星去極七十
四度半入畢宿六度 五車五星三柱九星距大星去
極四十七度半入畢宿八度半 天潢五星距西北星
去極五十八度入畢宿十一度 咸池三星距南星去
極五十一度入畢宿十一度半 天關一星去極七十

一度半入觜宿初度 參旗九星距南第一星大星去
極八十七度入畢宿六度 九斿九星距南星去極一
百一十三度入畢宿十二度 天園十三星距東北星
去極一百二十四度入畢宿五度

唐志畢十六度

唐志舊經畢七十八度開元測畢七十六度 又舊
經畢赤道十六度黃道亦十六度觜觿赤道二度黃
道三度二宿俱當黃道斜虛畢尚與赤道度同觜觿

總二度黃道損加一度蓋其誤也今測畢十七度半
觜觿半度

宋志畢宿漢永元銅儀畢十六度舊去極七十八度
景祐測驗畢宿十七度距畢口北星去極七十七度
步天歌以天節九州殊口附耳天街天高五車三柱
天潢咸池天關天園諸星皆屬畢宿武密書以天節
屬昴參旗天關五車三柱皆屬觜與步天歌不同乾
象新書以天節參旗皆屬畢天園西八星屬昴東五

星亦屬畢五車北西南二大星屬畢東二星及三柱
屬參說皆不同

金志赤道宿度畢十七度少黃道宿度畢十六度半
漢洛下閎測畢十六度 唐一行測畢十七度 宋
皇祐測畢十八度 元豐測畢十七度 崇寧測畢
十七度少 元郭守敬測畢十七度四十分
月令正義酉為大梁初胃七度終於畢十一度
漢天文志占於街南畢主之

晉天文志自畢十二度至東井十五度為實沈於辰

在申魏之分野屬益州

費直起畢九度
蔡邕起畢六度

律歷志立夏日日在畢十二度

李志昴畢大梁之次於辰在酉於周為冀趙之分也而
胃宿附入焉史記曰昴畢冀州晉天文志曰自胃七度
至畢十一度為大梁趙分野唐天文志曰胃昴畢大梁
也初胃四度餘二千五百四十九秒入大梁中昴十度
終畢六度天原發微曰胃七至畢十一辰酉曰作噩律

姑洗斗辰趙分費直周易分野曰起婁十度蔡邕月令
章句曰起胃一度金史曰胃四度二十四分三十三秒
外入趙分大梁之次雖度數起終稍有不同而大梁之
為趙其占為昴畢則無不同也據山河以考之自魏郡
濁漳之北得漢趙國廣平鉅鹿常山東及清河信都北
據中山正定全趙之分又北逾衆山盡代郡鴈門雲中
定襄之地與北方之國皆其野也北紀之東陽表襄山
河以藩屏中國為畢分循北河之表西盡塞垣皆髦頭

故地為昴分若胃雖魯分而婁胃之墟東北負山胃得馬牧之氣與冀之北土同占蓋冀之北土馬牧之所蕃庶故天苑之象存焉

兩鎮三關志按昴七星曰髦頭畢曰罕車為邊兵爾雅曰濁謂之畢孫炎曰掩兔之畢或呼為濁因以名星蘇竟曰畢為天網昴畢同宮曰大梁之次於辰在酉於州為冀蓋趙之分也大同為趙之北郡在天街之南是為陽國鴈門寧武偏頭皆趙境故皆占畢史記曰昴畢冀

州張守節正義曰昴畢為大梁之次漢志曰趙地昴畢
分西有定襄雲中五原晉志曰自胃七度至畢十一度
為大梁金史曰胃四度二十四分三十三秒外入趙分
大梁之次畢七度九十六分秒外入晉分實沈之次劉
昭月令章句注曰胃一度至畢六度為清明穀雨大梁
趙分七宿分野說曰胃七至畢十一其次大梁辰酉曰
作噩格令趙分又費直周易說曰起尾九度蔡邕月令
章句曰起尾八度雖度數起終小有不同而大梁之為

趙大同三關之占畢則無不同也以一行山河兩戒考之則曰雲漢連坤維右而漸升又曰實沈下流得大梁然則趙為大梁其得雲漢之升氣無疑也故曰北紀山河之曲為晉代南紀山河之曲為巴蜀皆負險用武之國也又昴畢之間為天街太乙統宗曰自魏郡漳河東達清河信都北據中山正定又北逾衆山盡漢代郡鴈門雲中定襄之地北紀之東陽表裏山河為畢宿之分循河之表西盡塞垣為昴之分又一行之說曰雲漢至

營室東壁間升氣悉究今五原雲中皆廢而大同三關東接宣府南臨正定實為衛水之北然則大同三關其得雲漢升氣之既究乎而大梁為趙大同三關占畢亦不易之論也

兩鎮三關志星主分野為論不同以星主言則十二諸侯之星燕者燕也趙者趙也今天街者隘塞也尾箕但主後宮昴畢但主聽主弋獵主邊兵而已何以為燕趙以分野言則本之山河兩戒之終始質以雲漢陰氣之

升降由是瓜分宿度定其次舍而析木為燕大梁為趙也故嘗謂分野之以列宿為度猶天樞之以小星為極寄其所指而已是故星主占星分野占天蓋並行而不悖也曰三關為昴畢分無疑乎曰鴈門恒山之西翼寧偏鴈門之兩垂其為昴畢是也但其宣汾晉而障天澤宅臺駘而仰參星存天闕之象當戌亥之門其尚得實沈之末氣而入大梁之初度者乎又畢七度九十六分六秒外入實沈之次為晉分則此可知矣

觜宿圖



丹元子步天歌

三星相近作參榮觜上坐旗直指天尊卑之位九相連
司怪曲立坐旗邊四鵠大近井鉞前

占候

觜二度在參之右角如鼎足形主天之闕明大則天下
安五穀熟隋志云觜觿為三軍之候行軍之藏府主葆
旅收斂萬物明則軍儲盈將得勢動而明葆旅起張衡
云葆旅野生之可食者坐旗九星在司怪西北主別君

臣尊卑之位明則國有禮司怪四星在井鉞前候天地日月星辰禽獸蟲蛇草木之變與天高占同

躔度

宋兩朝天文志觜三星距西南星去極八十二度半坐旗九星距南星去極六十一度半入參宿八度司怪四星距西星去極七十一度入參宿六度半

唐志觜二度

唐志舊經觜觿八十四度開元測觜觿八十二度

宋志觜觿漢永元銅儀唐開元游儀皆以觜觿為三
度舊志極八十四度景祐測驗觜宿三星一度距西
南星去極八十四度在赤道內七度

步天歌坐旗司怪俱屬觜宿武密書及乾象新書皆
屬於參

金志赤道宿度觜半度黃道宿度觜半度

漢洛下閎測觜二度唐一行測觜一度宋皇祐

測觜二度元豐測觜二度崇寧測觜半度元

郭守敬測觜五分

唐志上黨次居下流與趙魏接為觜觿之分

李淳風法象志觜觿參伐皆直天關表而在河陰故實沈下流得大梁距河稍遠涉陰亦深

漢志歲星六月出石氏在觜觿參

晉志觜參魏益州

洛書甄耀度西方白虎而觜參為虎首故有觜之義

李志觜參實沈之次於辰在申於州為益

晉魏冀并之
城不曰冀并

而曰益州何也春秋元命苞云參伐流為益州益之為言阨也言其所在之地險阨也一曰疆壤益大故以名焉非今之西蜀益州也

晉魏之分也而井宿附入焉晉語曰實沈之虛晉人是居晉天文志曰自畢十二度至井十五度為實沈魏分野唐天文志曰觜觿參伐實沈也初畢七度餘八百四十一秒四之一中參九度終東井八度天原發微曰畢十二至東井十五辰申曰渚灘律中呂斗已晉魏分費直周易說曰起畢九度蔡邕月令章句曰起畢六度金史曰畢七度九十六分秒外入晉分實沈


之次雖度數起終稍有不同而實沈之為晉魏其占為
參井則無不同矣據山河以考之自漢之河東及上黨
太原盡西河之地古晉魏虞唐耿楊霍冀黎郇與西河
戎狄之國皆其野也河東永樂芮城河北縣及河曲豐
勝夏州皆東井之分參伐為戎索為武政當河東盡大
夏之墟上黨次居下流與趙魏接為觜觿之分然晉志
又稱東井與鬼秦雍州分下列雲中入東井一度定襄
入東井八度鴈門入東井十六度代郡入東井二十八

度太原入東井二十九度上黨入興鬼二度而秦地不與焉夫井鬼秦分不應全主乎冀域而參實晉星乃遺而不道且雲中諸郡為趙近邊漢史占日暈曰參為趙畢為邊兵令縱不以屬昴畢又不及參而專曰井鬼可乎及觀唐書謂西河之濱所以設險限秦晉故其地上應天關其南曲之陰在晉地衆山之陽南曲之陽在秦地衆山之陰陰陽之氣并故與東井通況晉秦俱為西方相屬附入似亦未為晉誣者彼求其說而不得乃

謂魏徙大梁則西河合於東井秦拔宜陽而上黨入于
輿鬼是又穿鑿附會之論也然晉自文公後十六世韓
趙魏自立號為三晉今分野昴畢為趙分觜參為晉魏
分乃獨遺韓何也考之分野十二次蓋星家錯舉諸國
界域而分配之耳及相侵伐犬牙深入如上黨本韓之
別都遠韓近趙後卒降趙則為趙地而其分野又屬參
井為魏分焉夫謂參井為魏分者非專以魏地言之也
言魏則韓舉之矣又自軫十二度至氐四度壽星之次

晉書以為鄭分野天原發微以為韓分野考鄭自武公後二十三世為韓所滅而韓都於新鄭豈所謂鄭之分野即韓之墟乎史記曰韓地角亢氐之分野韓分晉得南陽郡及潁川之父城定陵襄城潁陽潁陰長社陽翟邲東接汝南西接弘農得新安宜陽鄭今河南之新鄭及成臯滎陽潁川之嵩高陽城則韓地在河南即鄭分亦有可証不誣者以此而觀三晉之地最廣不可以山西限也亦明矣

參宿圖



丹元子步天歌

總有七星背相侵兩肩雙足三為心伐有三星足裏深
玉井四星右足陰屏星兩扇井南襟軍井四星屏上吟
左足下四天厠臨厠下一物天屎沉

占候

參十度上為五星日月中道甘氏曰參為忠良孝謹之
子明大則臣忠子孝安吉一曰參伐一曰大辰一曰天
市一曰鈇鉞又為天獄又主權衡所以平理也又主邊

城為九譯故不欲其動也參白虎之體其中三星橫列
三將也東北曰左肩主左將西北曰右肩主右將東南
曰左足主後將軍西南曰右足主偏將軍故黃帝占參
應七將中央三小星曰伐天之都尉也又曰七將皆明
天下兵精也玉井四星在參西右下水象也屏二星在
玉井南屏為屏風玉井東西四星曰軍井行軍之井也
軍井未達將不言渴名取此也又曰主軍營之事天廁
四星在屏東溷也天屎一星在廁南色黃則吉

躔度

宋兩朝天文志參十星距中星西第一星去極九十二度半

玉井四星距西北星去極九十八度少入畢宿十一度半

天屏二星距南星去極一百一十五度入畢宿十三度半

軍井四星距西南星去極一百五度半入畢宿十四度

天廁四星距西北星去極一百一十八度半入參宿二度

尿一星去極一百一十五度入參宿三度半

唐志參九度

唐志舊經參九十四度開元測參九十三度

宋志參宿漢永元銅儀參八度舊去極九十四度景祐測驗參宿十星十度右足入畢十三度

步天歌玉井軍井廁各四星屏二星天尿一星俱屬

參宿晉志玉井在參左足武密書屬觜乾象新書屬
畢軍井晉志在玉井南武密亦屬觜乾象新書亦屬
畢唐開元游儀在玉井東南屏廁天屎晉志皆不載
隋志屏在玉井南開元游儀在觜隋志廁在屏東屎
在廁南乾象新書皆屬參與步天歌互有不同
金志赤道宿度參十度半黃道宿度參九度太

漢洛下閎測參九度 唐一行測參十度 宋皇祐
測參九度 元豐測參九度 崇寧測參十度半

元郭守敬測參十一度一十分

左傳昭元年子產曰后帝遷實沈於大夏主參

杜註后帝

堯也大夏
今晉陽縣

又曰當武王邑姜方震大叔夢帝謂已余

命而子曰虞將與之唐屬諸參而蕃育其子孫及生
有文在其手曰虞遂以命之及成王滅唐而封大叔
焉故參為晉星由是觀之則實沈參神也

杜註叔虞
封唐是為

晉
侯

國語董因對晉公曰歲在大梁將集天行元年始受

實沈之星也實沈之虛晉人是居所以興也以辰出而以參入皆晉祥也

漢天文志晉之疆候辰星占參伐

漢志歲星四月出太初在參伐


漢志歲星六月出甘氏在參伐

馬融上日食封事參居兑位屬西方其為分野并州是也

漢五行志劉歆言傳曰時有毛虫之孽參虎星故為

毛虫

井宿圖



丹元子步天歌

八星橫列河中靜一星名鉞井邊安兩河各三南北正
天鐔三星井上頭樽上橫列五諸侯侯上北河西積水
欲覓積薪東畔是鉞下四星名水府水位東邊四星序
四瀆橫列南河裏南河下頭是軍市軍市團圓十二星
中有一個野雞精孫子丈人市下列各立兩星從東說
闕邱兩星南河東邱下一狼光蓬茸左邊九個弧矢弓
一矢擬射頑狼胸有個老人南極中春秋出來壽無窮

占候

井三十四度甘氏云井八星在河中主泉水日月五星
貫之為中道石氏謂之東井亦曰天井主諸侯帝戚三
公之位故明大則封侯建國張衡云天之南門也黃道
所經為天子之亭候主水衡事法令所取平也王者用
法平則井明而端列鉞一星附井之前不欲其明月宿
井有風雨之應又曰井為天子府中有六星不欲太明
南北兩河各三星分夾東井一曰天高天之闕門主關

梁河南曰南戌一曰南宮一曰陽門一曰越門一曰權
星主火河北曰北戌一曰北宮一曰陰門一曰胡門一
曰衡星主水兩戌之間三光之常道也天鐫三星在五
諸侯南主盛饘粥以給酒食之正也張衡云以給貧餒
明則豐或言暗吉五諸侯五星在東井東北近北河主
刺舉戒不虞又曰治陰陽察得失一曰師二曰友三曰
三公四曰博士五曰太史又曰五曰大夫此五者常定
疑議星明大潤澤則天下大治張衡又曰五諸侯治陰

陽察得失明而潤大小齊等則國之福積水一星在河
北所以洪酒用也積薪一星在積水東以備庖廚之用
明則人主康水府四星在東井西南水官也占與水位
同水位四星在東井主水衡又主瀉溢流也四瀆四星
在井南軒轅東以江河淮濟之積精也軍市十三星如
錢狀在參東南天軍貨易之市野雞一星在軍市中主
變怪也軍市西南二星曰丈人丈人東二星曰子子東
二星曰孫丈人主壽考之臣子與孫皆侍丈人之側相

扶而居守常無咎闕兵三星在南河東主象魏天子之
雙闕諸侯之兩觀也狼一星在井東南為野將色有常
不欲變動色黃白而明吉弧矢九星在狼東南天弓也
以備盜賊嘗向狼老人一星在弧南一曰南極常以秋
分之旦見於丙春分之夕沒於丁常以秋分候之南郊
明大則人主有壽天下安寧

躔度

宋兩朝天文志井八星距西扇北第一星去極六十九

度鉞一星去極六十九度少入參宿八度半 北河
三星距東大星去極六十一度半入井宿二十度 南
河三星距東大星去極八十三度半入井宿二十一度
天鐔三星距西星去極六十八度入井宿十六度

五諸侯五星距西星去極五十六度半入井宿六度半
積水一星去極五十四度半入井宿十八度 積薪
一星去極六十五度半入井宿二十七度 水府四星
距西星去極七十六度半入參宿七度半 水位四星

距西星去極七十三度半入井宿十八度 四瀆四星
距西南星去極八十六度入井宿二度 軍市十三星
距西北星去極一百七度半入井宿初度 野雞一星
去極一百九度半入井宿四度半 丈人二星距西星
去極一百二十八度入參宿四度 子二星距西星去
極一百二十八度入參宿九度 孫二星距西星去極
一百二十五度入井宿六度 闕邱二星距大星去極
九十一度少入井宿十五度 狼一星去極一百七度

半入井宿十度 弧矢九星去極一百一十四度入井宿十五度 老人一星去極一百四十三度入井宿三度

唐志井三十三度

唐志舊經東井七十度開元測東井六十八度

宋志南方東井漢永元銅儀井宿三十度唐開元游儀三十三度去極七十度景祐測驗亦三十三度距西北星去極六十九度

步天歌自五諸侯至水府常星一十八坐俱屬東井
武密書以丈人二星子孫各一星屬牛宿乾象新書
以丈人與子屬參孫屬井又以水府四星亦屬參武
密以水府屬井餘皆與步天歌合

金志赤道宿度井三十三度少黃道宿度井三十度
半 漢洛下閎測井三十三度 唐一行測井三十
三度 宋皇祐測井三十三度 元豐測井三十三
度 崇寧測井三十三度少 元郭守敬測井三十

三度三十分

晉天文志東井輿鬼秦雍州 雲中入東井一度

定襄入東井八度 雁門入東井十六度 代郡入

東井二十八度 太原入東井二十九度

漢志歲星五月出太初在東井輿鬼

漢志歲星七月出石氏在東井輿鬼

晉天文志自東井十六度至柳八度為鶡首於辰在

未秦之分野屬雍州

費直起井十三度
蔡邕起井十度

隋地理志自東井十度至柳八度秦分野

唐志河東永樂芮城河北縣及河曲豐勝夏州皆東井之分

李淳風法象志東井據百川上流故鶡首為秦蜀墟得兩戒山河之首雲漢達坤維右而漸升始居列宿上魏徙大梁則西河合於東井

月令正義申為實沈初畢十二度終於井十五度月令仲春之月日在奎昏弧中旦建星中正義弧與

建星非二十八宿而昏明舉之者由弧星近井建星
近斗井有三十三度斗有二十六度其度既寬若舉
井斗不知何日的至井斗之中故舉弧星建星也
宋元嘉厯五月五日日在井三度


利瑪竇云天河自井接尾箕

兩鎮三關志上谷入尾一度恒山入昴五度雲中入東
井二度定襄入東井八度鴈門入東井十六度代郡入
東井二十八度按躔次之說史漢不道至晉書乃載之

志而雜引范蠡鬼谷諸人以為其言如此間嘗反覆推之多不符合昔人曰躔次本李淳風定豈洪氏所謂蔽於天而不知地者乎即以茲土論之惟上谷入尾一度其言是也他若常山入昴五度已稍有乖至於雲中定襄鴈門代郡之為東井則尤不可解矣夫東井秦分不應主乎冀域而參實晉星乃却遺而不道且雲中諸郡為趙近晉今縱不以之屬昴畢而更不以之入參不亦繆哉漢史占月暈曰參為趙畢為邊兵今不及參而曰

東井可乎故曰分野之說一行為正山河兩戒陰陽升
降其理精矣

張宿圖



丹元子步天歌

六星似軫在星傍張下只是有天廟十四之星冊四旁
長垣少微雖向上星數倚在太微傍天尊一星直上黃

占候

張十七度甘氏云主天廟明堂御史之位上為天之中
道若明大國則盛強隋志云主珍寶宗廟所用及衣服
又主天廚飲食賞賚之事星明則王者行五禮得天之
中動則賞賚或云主貢物張南十四星曰天廟祖廟也

其占與虛梁同長垣四星在少微南主界域少微四星在太微西南北列士大夫之位也一名處士或曰博士官一曰主衛掖門南第一星為處士第二星為議士第三星為隱士第四星為大夫明大而黃則賢士舉

躔度

宋兩朝天文志張六星距西第二星去極一百二度半天廟十四星距西北星去極一百十三度半入柳宿十三度長垣四星距南星去極七十六度入張宿十

四度 少微四星距東南大星去極六十五度半入張宿十五度半

唐志張十八度

唐志舊經張九十七度開元測張百度又舊經張中
央四星為朱鳥喙外二星為翼比距以翼而不距以
膺故張增二度半七星減二度半今復以膺為距則
七星張各得本度

宋志張宿漢永元銅儀張宿十七度唐開元游儀十

八度舊去極九十七度元祐測驗張十八度距西第二星去極一百三度

天廟十四星晉志雖列二十八宿外而亦曰在張宿南與隋志步天歌合

金志赤道宿度張十七度少黃道宿度張十七度太
漢洛下閎測張十八度 唐一行測張十八度 宋
皇祐測張十八度 元豐測張十七度 崇寧測張
十七度少 元郭守敬測張十七度二十五分

晉天文志河東八張一度

月令正義干為鶉火初柳九度終於張十六度

漢志歲星六月出太初在注張七星

漢志歲星八月出甘氏在注張

二十八舍明時占晉疆分野隸昴畢觜參井五星

平陸芮城志又謂八張一度故列六星於前而漢

晉史志則謂并州隸室壁上黨八輿鬼至危奎婁

柳四星亦時涉晉分野蓋東井觜觿間為日行中

道兩河兩戒之中又胥以中條太行風陵砥柱為
衡故晉疆經星分野視十四布政司獨多今附列
於左至北極宮天市垣女宿諸星多主三晉胥有
星經可考金水諸星亦附列焉

危宿丹元子步天歌

三星不直舊先知危上五黑號人星人下三四杵白
形人上七鳥號車府府上天鉤九黃晶鉤上五鵠字
造父危下四星號墳墓墓下四星斜虛梁十箇天錢

梁下黃墓傍兩星能蓋屋身著黑衣危下宿

躔度

宋兩朝天文志危三星距南星去極九十六度人
五星距西南星去極七十度入虛宿六度半杵三
星距南星去極六十一度半入危宿三度白四星
距西南星去極六十九度半入危宿二度半車府
七星距西第一星去極五十六度半入虛宿四度半
造父五星距北星去極三十八度入危宿十一度

墳墓四星距中星去極九十六度入危宿五度半

虛梁四星距東西去極一百度半入危宿八度

天錢十星距東北星去極一百一十八度入危宿三度
蓋屋二星距西星去極九十七度入虛宿九度

唐志危十七度

唐志舊經危九十七度開元測危九十七度又舊
經危北星舊圖入危今測在虛六度

宋志危宿漢永元銅儀以危為十六度唐開元游

儀十七度舊去極九十七度距南星去極九十八度在赤道外七度

步天歌虛梁下諸星相屬危宿晉志不載人星車府隋志有之杵臼星晉隋志皆無造父鈎星晉志屬紫微垣蓋屋虛梁天錢在二十八宿外乾象新書以車府西四星屬虛東三星屬危武密書以造父屬危又屬室餘皆與步天歌合按乾象新書又有天綱一星在危宿南

金志赤道宿度危十五度黃道宿度危十六度

漢洛下閎測危十七度 唐一行測危十七度

宋皇祐測危十六度 元豐測危十七度 崇寧

測危十五度半 元郭守敬測危十五度四十分

晉天文志自危十六度至奎四度為娵訾於辰在

亥衛之分野屬并州

賈直起危十四度
蔡邕起危十度

隋地理志自危十六度至奎四度屬并州

漢志歲星十二月出太初在婺女虛危

室宿丹元子步天歌

兩星上有離宮出遶室三雙有六星下頭六箇雷電
形壘壁陣次十二星十二兩頭大似并陣下分布羽
林軍四十五卒三為羣軍西四星多難論子細歷歷
看區分三粒黃金名鈇鉞一顆真珠北落門門東八
魁九箇子門西一宿天綱是電傍兩黑土公吏騰蛇
室上二十二

躔度

宋兩朝天文志室二星距南星去極八十度半 雷
電六星距西南星去極八十七度入危宿十二度
壁陣壘十二星距西第一星去極一百十五度入女
宿十一度 羽林四十五星距大星去極一百一十
七度入危宿十五度半 鈇鉞三星距北星去極一
百三十度入室宿四度 北落師門一星去極一百
二十六度入危宿十一度半 八魁九星距南星去
極一百三十九度入壁宿四度半 天網一星去極

一百二十九度入危宿五度 土公二星距西星去極八十五度入壁宿初度 騰蛇二十二星距中大星去極四十四度少入危宿九度半

唐志營室十六度

唐志舊經營室八十五度開元測營室八十三度
宋志營室漢永元銅儀營室十八度唐開元游儀
十六度舊去極八十五度景祐測驗室十六度距
南星去極八十五度在赤道外六度

步天歌雷電下八魁諸星皆屬營室雷電土公吏
斧鉞晉志皆不載隋志有之壘壁陣北落師門天
網羽林軍晉志在二十八宿外騰蛇屬天市垣武
密書屬營室又屬壁宿乾象新書以西十六星屬
尾屬危東六星屬室羽林軍西六星屬危東三十
九星屬室以天網屬危斧鉞屬奎通占錄又以斧
鉞屬壁屬奎說皆不同

金志赤道宿度室十七度黃道宿度室十八度少

漢洛下閎測室十六度 唐一行測室十六度

宋皇祐測室十七度 元豐測室十六度 崇寧

測室十六度 元郭守敬測室十七度一十分

漢天文志營室東壁并州

晉天文志營室東壁衛并州

春秋元命苞營室流為并州分為衛國

漢志歲星正月晨出東方太初歷在營室東壁

漢志歲星三月出石氏甘氏曰在營室東壁

壁宿丹元子步天歌

兩星下頭是霹靂霹靂五星橫著行雲雨次之曰四方壁上天廐十圓黃鈇鎖五星羽林傍

躔度

宋兩朝天文志壁二星距南星去極八十度半霹靂五星距西星去極九十三度入危宿十五度雲雨四星距西北星去極九十五度入室宿五度天廐十星距西星去極四十九度半入壁宿初度

唐志壁九度

唐志舊經壁八十六度開元測東壁八十四度

宋志壁宿漢永元銅儀東壁二星九度舊去極八十六度景祐測驗壁二星九度距南星去極八十五度

步天歌壁宿下有鐵鎖五星晉隋志皆不載隋志八魁西北三星曰鐵鎖又曰鐵鉞其占與步天歌室宿內斧鉞畧同恐重出霹靂五星雲雨四星晉

志無隋志有武密書以雲雨屬室宿天廐十星晉
志屬天市垣說皆不同

金志赤道宿度壁八度黃道宿度壁九度半

漢洛下閎測壁九度 唐一行測壁九度 宋皇

祐測壁九度 元豐測壁九度 崇寧測壁八度

太 元郭守敬測壁八度六十分

奎宿丹元子步天歌

腰細頭尖似破鞋一十六星遶鞋生外屏七烏奎下

橫屏下七星天濶明司空左畔土之精奎上一宿軍
南門河中六箇閣道形附路一星道傍明五箇吐花
王良星良星近上一策名

躔度

宋兩朝天文志奎十六星距西南大星去極七十二
度 外屏距西星去極八十九度入壁宿八度半
天濶七星距西南星去極九十七度入奎宿三度
土司空一星去極一百一十五度少入壁宿九度

軍南門一星去極六十六度入奎宿十五度 附路
一星去極三十五度半入奎宿五度 王良五星距
西星去極三十七度入壁宿初度

唐志奎十六度

唐志舊經奎七十六度開元測奎七十三度又舊
經奎誤距以西大星故壁損二度奎增二度今復
距西南大星即奎壁各得本度

宋志奎宿漢永元銅儀以奎為七十度唐開元游

儀十六度舊去極七十六度景祐測驗同

步天歌天溷下諸星俱屬奎宿晉志王良附路閣
道軍南門策星俱在天市垣別無外屏天溷土司
空等星隋志有之而武密以王良外屏天溷皆屬
壁或以外屏又屬奎乾象新書以王良西一星屬
壁東四星屬奎外屏西一星屬壁東六星屬奎與
步天歌各有不合

金志赤道宿度奎十六度半黃道宿度奎二十七

度太

漢洛下閎測奎十六度 唐一行測奎十六度

宋皇祐測奎十六度 元豐測奎十六度 崇寧

測奎十六度半 元郭守敬測奎十六度六十分

月令正義亥為娵訾初危十六終於奎四度

漢天文志歲星二月出太初在奎婁

漢志歲星四月出石氏廿氏在奎婁

婁宿丹元子步天歌

三星不勻近一頭左更右更烏夾婁天倉六箇婁下
頭天庾三星倉東脚婁上十二將軍侯

躔度

宋兩朝天文志婁三星距中星去極七十五度半

左更五星距西南星去極七十六度半入婁宿四度
半 右更五星距東北星去極七十五度入奎宿十
四度 天倉六星距西北星去極一百四度半入奎
宿十一度 天庾三星距中大星去極一百二十五

度半入婁宿五度 天大將軍十二星距火星去極六十度半入婁宿四度

唐志婁十二度

唐志舊經婁八十度開元測婁七十七度

宋志婁宿漢永元銅儀以婁為十二度唐開元游儀十二度舊去極八十度景祐側驗婁宿十二度距中央大星去極八十度在赤道內十一度

晉志天倉天庾在二十八宿之外天大將軍屬天

市垣左更右更惟隋志有之乾象新書以天倉屬奎武密屬奎又屬婁步天歌皆屬婁宿

金志赤道宿度婁十二度黃道宿度婁十二度太漢洛下閎測婁十二度唐一行測婁十二度

宋皇祐測婁十二度元豐測婁十二度崇寧測婁十二度元郭守敬測婁十一度八十分

趙分野費直起婁十度蔡邕起婁一度

胃宿丹元子步天歌

三星鼎足河之次天廩胃下斜四星天囷十三如乙
形河中八星名大陵陵北九個天船名陵中積尸一
個星積水船中一黑星

躔度

宋兩朝天文志胃三星距西南星去極六十七度半
天廩四星距南星去極八十五度半入胃宿十二
度天囷十三星距大星去極九十一度半入胃宿
六度半大陵八星距大星去極五十四度入胃宿

七度 天船九星距大星去極五十四度半入胃宿
十度 積尸一星去極五十五度入胃宿四度 積
水一星去極五十三度入昴宿初度

唐志胃十四度

唐志舊經胃昴七十四度開元測胃昴七十二度
宋志胃宿漢永元銅儀胃宿十五度景祐測驗十
四度

晉志大陵積尸天船積水俱屬天市垣天囷天廩

在二十八宿之外武密以天囷大陵屬婁又屬胃
天船屬胃又屬昴乾象新書天囷五星屬婁餘星
屬胃大陵西三星屬婁東五星屬胃與步天歌互
有不同

金志赤道宿度胃十五度黃道宿度胃十五度半
漢洛下閎測胃十四度 唐一行測胃十四度

宋皇祐測胃十五度 元豐測胃十四度 崇寧
測胃十四度 元郭守敬測胃十五度六十分

晉天文志自胃七度至畢十一度為大梁於辰在

酉趙之分野屬冀州

費直起婁十度
蔡邕起婁一度

隋地理志自胃七度至畢十一度屬冀州

唐志胃得馬牧之氣

月令正義戌為降婁初奎五度終於胃六度

漢志歲星三月出太初在胃昴

漢志歲星五月出石氏甘氏在胃昴畢

鬼宿丹元子步天歌

四星冊方似朱櫃中央白者積天氣鬼上四星是耀
位天狗七星鬼下是外廚六間柳星次天社六個弧
東倚社東一星是天紀

躔度

宋兩朝天文志鬼四星距西南星去極六十九度半
耀四星距西北星去極六十度半入井宿二十九
度天狗七星距西星去極一百二度入井宿二十
二度外廚六星距大星去極九十二度半入鬼宿

二度 天社六星距西南星去極一百三十四度入井宿十二度 天紀一星去極一百一度半入柳宿五度

唐志鬼四度

唐志舊經與鬼六十八度開元測與鬼六十八度宋志與鬼漢永元銅儀與鬼四度舊去極六十八度景祐測驗與鬼三度距西南星去極六十九度晉志燿四星屬天市垣天狗七星在七星北武密

以天狗屬牛宿又屬輿鬼乾象新書屬井外廚六
星晉志在柳宿南武密書亦屬柳乾象新書與步
天歌皆屬輿鬼天紀一星武密書及乾象新書皆
屬柳惟步天歌屬鬼宿天社六星武密書屬井又
屬鬼乾象新書以西一星屬井中一星屬鬼末一
星屬柳今從步天歌以諸星俱屬輿鬼

金志赤道宿度鬼二度半黃道宿度鬼二十度半
漢洛下閎測鬼四度唐一行測鬼三度宋皇

祐測鬼二度 元豐測鬼四度 崇寧測鬼二度

半 元郭守敬測鬼二度二十分

晉天文志上黨入輿鬼二度

李淳風法象志秦拔宜陽而上黨入於女鬼

柳宿丹元子步天歌

八星曲頭垂似柳近上三星號為酒享宴大酺五星

守

躔度

宋兩朝天文志柳八星距西第三星去極八十二度
半酒旗三星距西北星去極七十七度入柳宿十
四度

唐志柳十五度

唐志舊經柳七十七度開元測柳八十度半又舊
經柳誤距以第四星今復用第四星

宋志柳宿漢永元銅儀以柳為十四度唐開元游
儀十五度舊去極七十七度景祐測驗柳八星一

十三度距西頭第二星去極八十三度

晉志酒旗在天市垣步天歌屬柳宿通古鏡亦屬
柳又屬七星乾象新書亦屬七星與步天歌不同
金志赤道宿度柳十三度太黃道宿度柳十三度
少

漢洛下閎測柳十五度 唐一行測柳十五度

宋皇祐測柳十四度 元豐測柳十五度 崇寧

測柳十三度太 元郭守敬測柳十三度三十分

隋地理志自柳九度至張十六度屬三河

月令正義未為鶉首初井十六度終於柳八度

漢志歲星八月出石氏在柳七星張

李志按星野之說其傳也遠自星經散佚黃帝巫咸之書世尠得聞後之作堪輿者雖有郡國所入非古數也康成引十二次之分本漢地大畧見於左氏國語左氏謂大梁集行晉文昌其霸實沈為祟晉平受其殃則驗災祥於星土其法蓋古有之然而揚之地南而星紀則

在丑冀之地北而大梁則在酉況歷代郡縣廢置不同而歷數與歲差又不能盡合也及觀賈公彥氏謂唐叔始受封之年值歲星所在其國屬焉故以歲為福地說亦可疑昔子產稱高辛氏有子曰閼伯封於商邱主祀大火商人是因季曰實沈封於大夏主祀參唐人是因是古人始封嘗命以主祀也若謂受封之辰則春秋列國之裔孫以占妖祥可耳至後世占分野而妖祥亦應豈皆古者受封之辰乎夫星土分星難拘州國周禮司

徒言十有二土未嘗指言其所應保章氏言以星土辨九州之地未嘗析言其所辨竊謂星土以精氣相屬而不繫乎方隅占測以山河為限而不主乎州國此一行兩戒之說為通論也

朱之俊分野辨分野之說緣星而紀未嘗屑屑然為之辨也以分野宮度論之明厯畢六度過申西洋厯畢八度過申明厯井八度過未西洋厯井初度過未是申宮竝無井度矣且參七星伐三星共十星參原十度皆止


半度今西洋厯增背為十度而參度反刪其九則在天止有參星一度耳參星雖削晉益猶附則今晉益屬參無疑也益實是蜀蜀與晉相隔甚遠而分野則同亦如齊魯接壤而魯屬西方奎婁之分齊屬北方虛危之分中隔亥宮三十餘度宋衛接壤而衛屬北方室壁之分宋屬東方房心之分中隔燕吳齊三宮九十餘度地近而天遠之地遠而天近之其理甚微攷明山西通志有益阨之言謂益不係蜀作阨字解是十二宮中竟缺四

川一省也烏乎可

欽定四庫全書

卷二

北斗星主山西圖



丹元子步天歌

北斗之星七星明第一主帝為樞星第二第三璇璣是
第四名權第五衡開陽搖光六七名紫宮之次是諸星

占候

北斗七星在太微北七政之樞機陰陽之本元也故運
乎天中而臨制四方以建四時而均五行也魁四星為
璇璣杓三星為玉衡又曰斗為人君之象號令之主又
為帝車取乎運動之義也又魁第一星曰天樞二曰璇

三曰璣四曰權五曰玉衡六曰開陽七曰搖光一至四
為魁五至七為杓樞為天璇為地璣為人權為時玉衡
為音開陽為律搖光為星石氏云第一曰正星主陽德
二曰法星三曰令星四曰伐星五曰殺星六曰危星七
曰部星亦曰應星又云一主天二主地三主火四主水
五主土六主木七主金又曰一主秦二主楚三主梁四
主吳五主趙六主燕七主齊

躔度


金匱要略卷二
北斗七星天樞去極二十三度半入張宿十度 搖光
去極三十五度入角宿九度

春秋緯文耀鉤云太行以東至碣石王屋砥柱冀州
屬樞星蓋帝張四維運之以斗月徙一辰復返其所

故其主如此

星有七州有九但兗青徐揚
并屬二州故七星主九州也

天市垣星主山西圖



丹元子步天歌

下元一宮名天市兩扇垣牆二十二當門六角黑市樓
門左兩黃是車肆兩個宗正四宗人宗星一雙亦依次
帛度兩星屠肆前侯星還在帝座邊帝座一星常光明
四個微芒宦者星以次兩星名列肆斗斛帝前依其次
斗是五星斛是四

占候

天市垣二十二星在房心東北主權衡主聚衆一曰天

旗庭市中星衆潤澤則歲實市樓六星在市中臨箕星
之上主司闕闕明則吉隋志市樓者市府也主市價律
度其陽為金錢其陰為珠玉變見各以所主占之車肆
二星在天市垣南門之內主車駕隋志主衆賈之區宗
正二星在帝坐東主宗大夫也明則宗室有秩宗人四
星在宗正東主錄親疎享祀如綺而明正族人有序宗
星二星在宗人東北侯星之東宗室之象帛度二星在
宗室星東北主度量明則尺量平商人不欺屠肆二星

在帛度東北主烹宰侯一星在帝坐東北主伺陰陽也
細微則國安居常則吉帝座一星在天市中侯星西天
庭也光而潤則天子吉威令行一曰神農所居宦者四
星在帝坐西南帝傍之闇人也星微則吉其占與勢星
同列肆二星在斛西北主寶玉之貨斗五星在宦者西
南主平量覆則歲熟明暗與帛度同斛四星在市樓北
亦曰天斛主量者也占與斗同

躔度

宋兩朝天文志天市垣二十二星東西列各十一星其東垣南第一星曰宋第二星曰南海第三星曰燕第四星曰東海第五星曰徐第六星曰吳越第七星曰齊第八星曰中山第九星曰九河第十星曰趙第十一星曰魏其西垣第一星曰韓第二星曰楚第三星曰梁第四星曰巴第五星曰蜀第六星曰秦第七星曰周第八星曰鄭第九星曰晉第十星曰河間第十一星曰河中東垣南第一星宋去極一百五度半入危宿七度西垣第


一星韓去極九十八度半入心宿五度

李志天市垣二十二星五星主晉宋天文志云天垣星在房心東北下照二十二處其東垣十一星第八星曰中山第十星曰趙第十一星曰魏其西垣十一星第一星曰韓第九星曰晉蓋象天王在上諸侯朝王王出臯門大會東方諸侯在應門右西方諸侯在應門左也

蘇伯衡論分野天有三垣紫微太微天市是也紫微太微皆將相輔佐之位而下市下垣則列國星宿之所在

其星東西二十有二宋南海燕東海徐吳越齊中山趙
九河魏韓楚梁巴蜀秦鄭河中河間晉周曰分野者指
列星所屬之分而言鄭氏謂星所主土是也其國在此
而星則在彼彼此若不相配而其為象未嘗不相屬非
地之在北者其分野在天亦居北也地之在南者其分
野在天亦居南也

女分諸國星主山西圖



丹元子步天歌

四星如箕主嫁娶十二諸國在下陳先從越國向東論
東西兩周次二秦雍州南下雙鴈門代國向西一晉仲
韓魏各一晉北輪楚之一國魏西屯楚城南畔獨燕軍
燕西一郡是齊隣齊北兩邑平原君欲知鄭在越下存
十六黃星細區分五箇離珠女上星敗瓜珠上瓠瓜生
兩箇各五瓠瓜明天津九箇彈弓形兩星八牛河中橫
四箇奚仲天津上七箇仲側扶箱星

占候

女十一度下九尺為日月中道天之少府也謂之須女
主婦女之位星明天下豐女功昌十二國有十六星齊
一星在九坎之東齊北二星曰趙趙北一星曰鄭鄭北
一星曰越越東二星曰周周東南北列二星曰秦秦南
二星曰代代西一星曰晉晉北一星曰韓韓北一星曰
魏魏西一星曰楚楚南一星曰燕其星有變各以其國
占之

躔度

宋兩朝天文志女四星距西南星去極一百四度半
十二諸侯十六星其趙距西星去極一百二十三度八
牛宿四度

唐志舊經須女百度開元測須女百一度

石申星經曰魏二星在韓星北多隋志一星又曰晉
一星在代星北與隋志代西異

宋志女宿漢永元銅儀以須女為十一度景祐測驗

十二度距西南星去極百五度在赤道外十四度
步天歌十二國下諸星俱屬須女而十二國星晉志
不載隋志有之

漢洛下閎測女十二度 唐一行測女十二度 宋
皇祐測女十一度 元豐測女十二度 崇寧測女
十一度少 元郭守敬測女十一度三十五分

夾漈鄭氏曰謹按天之所覆者廣而華夏所占者牛女
下十二國耳牛女在東南故釋氏謂華夏為南瞻部州

其二十八宿所管者多十二國之分野隨其隸耳

通考揚州雖可言東南而牛女在天則北方宿也與南
贍部州之說異矣且北斗七星其次舍自張而至於角
星書以為一主秦二主楚三主梁四主吳五主趙六主
燕七主齊五車五星其次舍在畢星書以為西北一星
主秦東北一星主趙燕東南一星主魯衛中央一星主
楚西南一星主魏然則北斗五車所主者亦此十二國
而此二星初未嘗屬乎牛女也謂牛女專主華夏可乎

兩鎮三關志國星牛女之下十二諸侯之星也說者以
為天之所覆者廣華夏止宜占此其星有變各以其國
當之大同三關屬趙蔚及諸邑屬代或問既占分野何
以復占國星曰衆星者萬物之精質具於地而氣行於
天分野者周天之次舍懸象於上而示法於下考一國
之休咎則國星是稽察諸變之凌犯則分野必變蓋並
行也

山西得金水二星圖

○太白

●辰

太白主大臣其號上公也大司馬位謹候此晉灼曰常以正月甲寅與熒惑晨出東方二百四十日而入四十日又出西方二百四十日而入三十五日而後出東方出以寅戌入以丑未一歲而周天

辰星晉灼曰常以二月春分見奎婁五月夏至見東井八月秋分見角亢十一月冬至見牽牛出以辰戌入以丑未二旬而入晨候之東方夕候之西方一歲而周天太白屬金西方之星也辰星屬水北方之星也而三晉

與焉讀漢志注曰辰星主常山主冀幽并太白金主奎婁
胃昂畢觜參唐書曰實沈以負西海其神主於華山太
白位焉大梁以負北海其神主於恒山星辰位焉燕齊
候辰星占虛危晉亦候辰星占參罰雖其說微有不同
而西方金位北方水位則固不易之論也

諸星

中台下星主冀

招搖一星主北邊

近北斗
在杓端

天鋒一星

主北邊

一名元戈在招搖
北天伐也

梗河三星主北邊為劍戟之星

在帝席北招搖在其中按史記言杓端有兩星一內

為矛招搖一外為昏天鋒孟康曰梗河三星天矛天鋒

招搖一星耳而宋史既有招搖復有梗河通志畧曰元

戈在招搖北一曰天戈其占與梗河相類元戈即天鋒

則復有天鋒傳舍九星主使人賓客之館也長垣四

也故並存之天關一星主邊事在限隔內外障絕往

星主界城在少微南

南門二星主守兵在庫門南天之外折威七星主斬

殺在亢南陽門二星主邊塞險阻在庫樓東北狗二星主吠守

在南斗魁前河鼓三星主三將軍及闕梁險阻一名三武在牽牛北明大

光潤將天壘十二星主北邊圍如北落師門一星主非

軍吉天壘十二星主北邊圍如北落師門一星主非

圍如北落師門一星主非

圍如北落師門一星主非

圍如北落師門一星主非

圍如北落師門一星主非

圍如北落師門一星主非

常以候兵

在羽林西南明大則兵安

耀四星主烽火備警急

一日烽在鬼西

北占以不明

天根星

歲星所生也生尾宿中見以甲寅日有兩青方在旁

若彗星

安靜為吉

太白所生也

竹彗星

太白所生也生昴宿中見以庚寅有兩白方在旁

天撓

歲星

生昴宿中

之精也長數

燭星

見奎婁間

大雨頭銳

李志史遷曰德隆則晷星星隆則晷德昔武王祭畢而

干戈載戢宣王北伐而昴宿斯著魯僖公二十四年歲

星入實沈之次晉文公即位惟邁德以亮工序事而修

政則七曜順軌百祥併集蓋自然之符也

古志

春秋元命苞昴畢間為天街散為冀州分為趙國立為常山東井鬼星散為雍州分為秦國得東井動深之萌其氣險也觜參流為益州益之言隘也謂物類並決其氣急切決列也營室流為并州分為衛國并之為言誠也精舍交并其氣勇抗誠信也

晉之疆候辰星占參罰及秦并吞三晉燕代自河山呂南者為陽陽則日歲星熒惑鎮星占於街南畢主之其

西北為陰陰則月太白辰星占於街北昴主之

太歲在寅曰攝提格歲星正月晨出東方太初歷在營室東壁 在卯曰單闕二月出太初在奎婁 在辰曰

執徐三月出石氏甘氏曰在營室東壁太初在胃昴

在巳曰大荒落四月出石氏甘氏曰在奎婁太初在參罰 在午曰敦牂五月出石氏甘氏曰在胃昴畢太初

在東井輿鬼 在未曰協洽六月出石氏曰在觜觿參

甘氏在參罰太初在注張七星 在申曰涒灘七月出

石氏曰在東井與鬼 在酉曰作路八月出石氏曰在
柳七星張甘氏在注張太初在角亢 在戌曰掩茂九
月出甘氏在七星 在亥曰大淵獻十月出 在子曰
困敦十一月出 在丑曰赤奮若十二月出 四星亦
畧如此

晉天文志十二次班固取三統厯十二次配十二野其
言最詳又有費直說周易蔡邕月令章句所言頗有先
後魏太史令陳卓更言郡國所入宿度令附而次之

州郡躔次陳卓范蠡鬼谷先生張良諸葛亮譙周京房
張衡並云營室東壁衛并州而雲中定襄鴈門代郡太
原入東井上黨入輿鬼焉梁時星經辰星主恒山冀
州幽州并州 熒惑主輿鬼柳七星張鎮星主東井太
白主胃昴畢觜參 玉衡者謂斗九星也玉衡第八星
主幽州常以五寅日候之庚寅為上谷代郡玉衡第九
星主并州常以五申日候之甲申為五原鴈門丙申為
朔方雲中戊申為西河庚申為太原定襄壬申為上黨

凡八郡

唐天文志數從星紀起 星紀 元枵中危初大寒終
危十五度 娵訾初危十六度立春中營室十四度驚
蟄終奎四度 降婁初奎五度雨水中婁四度春分終
胃六度 大梁初胃七度穀雨中昴八度清明終畢十
一度 實沈初畢十二度立夏中井初小滿終井十五
度 鶉首初井十六度芒種中井三十一度夏至終柳
八度 鶉尾初張十八度立秋終於軫十一度

唐志舊經星度開元十一年治新厯率府兵曹參軍梁
令瓚造黃道游儀復測定焉以七宿之中分四象中
位自上元之首以度數紀之而著其分野其州雖改隸
不同但據山河以分爾

唐志胃得馬牧之氣與冀之北土同占胃昴畢大梁也
初胃四度餘二千五百四十九秒八太中昴六度終畢
九度自魏郡濁漳之北得漢趙國廣平鉅鹿常山東及
清河信都北據中山正定全趙之分又北逾衆山盡代

郡鴈門雲中定襄之地與北方羣狄之國北紀之東陽
表裏山河以藩屏中國為畢分循北河之表西盡塞垣
皆髦頭故地為昴分冀之北土馬牧之所蕃庶故天苑
之象存焉觜觿參伐實沈也初畢十度餘八百四十一
秒四之一中參七度終東井十一度自漢之河東及上
黨太原盡西河之地古晉魏虞唐耿揚霍冀黎郇與西
河戎狄之國西河之濱所以設險限秦晉故其地上應
天關其南曲之陰在晉地衆山之陽南曲之陽在秦地

衆山之陰陰陽之氣并故與東井通河東永樂芮城河
北縣及河曲豐勝夏州皆東井之分參伐為戎索為武
政當河東盡大夏之墟上黨次居下流與趙魏接為觜
觿之分

唐志貞觀中李淳風撰法象志因漢書十二次度數始
以唐之州縣配而一行以為天下山河之象存乎兩戒
北戒自三危積石負終南地絡之陰東及太華逾河並
雷首底柱王屋太行北抵常山之右乃東循塞垣至朝

鮮是謂北紀南戒自岷山嶓冢負地絡之陽東及太華連商山熊耳外方桐柏自上洛南逾江漢抵武當荆山至於衡陽乃東循嶺徼達東甌閩中是謂南紀河源自北紀之首循雍州北徼達華陰而與地絡相會並行而東至太行之曲分而東流與涇渭濟瀆相為表裏謂之北河江源自南紀之首循梁州南徼達華陽而與地絡相會並行而東及荆山之陽分而東流與漢水淮瀆相為表裏謂之南河故於天象則引農分陝為兩河之會

五服諸侯在焉自陝而西為秦涼北紀山河之曲為晉
代南紀山河之曲為巴蜀皆負險用武之國也自陝而
東三川中岳為成周西距外方大伾北至於濟南至於
淮東達鉅野為宋鄭陳蔡河內及濟水之陽為鄘衛淮
水之陰為申隨皆四戰用文之國也北紀之東至北河
之北為邢趙南紀之東至南河之南為荆楚自北河下
流南距岱山為三齊夾右碣石為北燕自南河下流北
距岱山為鄒魯南涉江淮為吳越皆負海之國貨殖之

所阜也自河源循塞垣北東及海為戎狄自江源循嶺
徼南東及海為蠻越觀兩河之象與雲漢之所始終而
分野可知矣於易五月一陰生而雲漢潛萌於天稷之
下進及井鉞間得坤維之氣陰始達於地上而雲漢上
升始交於列宿七緯之氣通矣東井據百川上流故鶉
首為秦蜀墟得兩戒山河之首雲漢達坤維右而漸升
始居列宿上觜觿參伐皆直天闕表而在河陰故實沈
下流得大梁距河稍遠涉陰亦深故其分野自漳濱卻

負恒山居北紀衆山之東南外接髦頭地皆河外陰國也十月陰氣進踰乾維始上達於天雲漢至營室東壁間升氣悉究於內規相接故自南正達於西正得雲漢升氣為山河上流自北正達於東正得雲漢降氣為山河下流娵訾在雲漢升降中居水行正位故其分野當中州河濟間且王良閣道由紫垣絕漢抵營室上帝離宮也內接成周河內皆豕韋分十一月一陽生而雲漢漸降退及艮維始下接於地至斗建間復與列舍氣通

於易天地始交泰象也踰析木津陰氣益降進及大辰
升陽之氣究而雲漢沉潛於東正之中故易雷出地曰
豫龍出泉為解皆房心象也星紀得雲漢下流百川歸
焉析木為雲漢末派山河極焉故其分野自南河下流
窮南紀之曲東南負海為星紀自北河末派窮北紀之
曲東北負海為析木負海者以其雲漢之陰也唯姬訾
內接紫宮在王畿河濟間降婁元枵與山河首尾相遠
鄰顓頊之墟故為中州負海之國也其地當南河之北

北河之南界以岱宗至於東海自鶉首踰河戒東曰鶉
火得重離正位軒轅之祗在焉其分野自河華之交東
接祝融之墟北負河南及漢蓋寒燠之所均也自析木
紀天漢而南曰大火得明堂升氣天市之都在焉其分
野自鉅野岱宗西至陳留北負河濟南及淮皆和氣之
所布也陽氣自明堂漸升達於龍角曰壽星龍角謂之
天關於易氣以陽決陰夾象也升陽進踰天關得純乾
之位故鶉尾直建巳之月內列太微為天庭其分野自

南河以負海亦純陽地也壽星在天關內故其分野在商亳西南淮水之陰北連大室之東自陽城際之亦巽維地也夫雲漢自坤抵艮為地紀北斗自乾抵巽為天網其分野與帝車相直皆五帝墟也究咸池之政而在乾維內者降婁也故為少昊之墟叶北宮之政而在乾維外者娵訾也故為顓頊之墟成攝提之政而在巽維內者壽星也故為太昊之墟布太微之政而在巽維外者鶉尾也故為列山氏之墟得四海中承太階之政者

軒轅也故為有熊氏之墟木金得天地之微氣其神治
於季月水火得天地之章氣其神治於孟月故章道存
乎至微道存乎終皆陰陽變化之際也若微者沉潛而
不及章者高明而過亢皆非穹昊之居也斗杓謂之外
廷陽精之所布也斗魁謂之會府陽精之所復也杓以
治外故鶉尾為南方負海之國魁以治內故娵訾為中
州四戰之國其餘列舍在雲漢之陰者八為負海之國
在雲漢之陽者四為四戰之國降婁元枵以負東海其

神主於岱宗歲星位焉星紀鶉尾以負南海其神主於
衡山熒惑位焉鶉首實沈以負西海其神主於華山太
白位焉大梁析木以負北海其神主於恒山辰星位焉
鶉火大火壽星豕韋為中州其神主於嵩嶽鎮星位焉
近代諸儒言星土者或以州或以國虞夏秦漢郡國廢
置不同周之興也王畿千里及其衰也僅得河南七縣
今天下一統而直以鶉火為周分則疆場舛矣七國之
初天下地形雌韓而雄魏魏地西距高陵盡河東河內

北固漳鄴東分梁宋至於汝南韓據全鄭之地南盡潁
川南陽西達虢略距函谷固宜陽北連上黨皆綿亘數
州相錯如繡考雲漢山河之象多者或至十餘宿其後
魏徙大梁則西河合於東井秦拔宜陽而上黨入於輿
鬼方戰國未滅時星家之言屢有明效今則同在畿甸
之中矣而或者猶據漢書地理志推之是守甘石遺術而
不知變通之數矣

按河分兩戒之說元明以來精於測驗者往往譏

其疎謬通雅云星土分野隋唐之志為詳然自西

法圖成則兩戒之說淺矣

利瑪竇為兩圖一載中國嘗見之星一載中國

所未見者天河自井接尾箕盡垓垓萬方而分度界之真可決從古之疑

又云河漢以

十月收二月見天下皆然而嶺表臘月晴煖之夜

仍見河漢總不收隱此從古無人道破者愚謂一

行此術不惟俯察地理若指諸掌實與觀斗柄而

知四時審中星以驗昏旦同符天象之自然要未

可廢而不錄也

容齋洪氏隨筆曰晉天文志謂自危至奎為娵訾於辰在亥衛之分野也屬并州且衛本受封於河內商虛後徙楚邱河內乃冀州所部漢屬司隸其他邑皆在東郡屬兗州於并州了不相干而并州之下所列郡名乃安定天水隴西酒泉張掖諸郡自係涼州耳又謂自畢至東井為實沈於辰在申魏之分野也屬益州且魏分晉地得河內河東數十縣於益州亦不相干而雍州為秦其下乃列雲中定襄鴈門代太原上黨諸郡蓋又自屬

并州及幽州耳晉志出於李淳風之手豈非蔽於天而不知地乎

元天文志列宿著於天為舍二十有八為度三百六十五有奇非日躔無以校其度非列舍無以紀其度周天之度合二者以得之天體渾圓當二極南北之中絡以赤道日月五星之行常出入於此天左旋日月五星遡而右轉昔人厯象日月星辰謂此也然列舍相距度數歷代所測不同古用闕管元郭守敬渾儀測用二綫焉

日之麗天懸象最著古人欲測躔度所在必以昏旦夜半中星衡考其所距從考其所當然昏旦夜半時刻未易得真時刻一差則所距所當不容無舛晉姜岌首以月食衝檢知日度所在紀元厯復以太白誌其相距遠近於昏後明前驗定星度因得日躔

陳繼儒羣碎錄遷關伯於商邱主辰遷實沈於大夏主參故辰為商星昏見參為晉星曉見二星晝夜不相見程之珖路志拾遺參井貴州及貴州宣慰司皆參井分

野與潞安同雲南亦井鬼分野亦有潞江產人參且一
二州郡言語飲食畧與潞同豈天氣同而人事亦因以
同乎及覽徐整長厯云北斗七星每星間去九千里其
二陰星相去八千里觀北斗而參井可知潞滇黔同照
無疑矣

郿縣志

陽曲志古稱太原參井分野此統一郡而言陽曲太原
之一邑耳舊志亦云參井分野何哉夫郡之西北既入

井復入昴畢郡之東北亦入井其東北逼近澤潞西南
直接汾州實居參宿分野原無可疑即帝王世紀及晉
唐天文志一云至東井十五度一云終東井八度此統
論實沈之次耳其云中參九度則陽曲之野也今據漢
志唐有晉水參為晉星之說惟以參宿為主

太原榆次太谷祁縣徐溝清源文水志胥同參井

交城志趙吉士參井分屬辯一統志武備志雲中鴈門
俱曰入東井汾州則曰參太原北與雲中鴈門界西南

與汾州界當二宿之交則所轄之地豈能曲折如一必有參差出入於二宿之間者故曰參井蓋言五州十二縣半屬參半屬井耳非謂太原所屬諸邑俱半參半井也據陳卓云太原入東井二十九度夫二十九度井之垂末度也曰入者侵而入之之辭也非全屬也今晉祠已屬參汾州又屬參豈交城獨半屬參半屬井耶據陳卓云代郡入東井是太原府以北諸州縣自屬井以南諸州縣自屬參則交城特屬參星無疑也

奇嵐志奇嵐止趙分之一不能當昴畢全度應在昴畢
十度之末畢度初

嵐縣志分野同奇嵐

興縣志分野之說諸家不同以太原屬晉則興為瞿參
分野以太原屬趙則興為昴畢分野以樓煩屬燕則興
為尾箕分野而李淳風作晉志謂太原入東井則又為
井鬼分野紛紜舛錯靡所折衷然繇唐一行之言觀之
東井輿鬼山河上流當主秦蜀大梁之次距河遠而涉

陰深故昴畢主趙應在河北無闕山右析木當雲漢末
派尤與燕代無涉今鴈門定襄代郡樓煩皆屬太原為
北紀山河之曲則當主觜參信有徵矣故斷以興為觜
參分野

平陽志觜參分野

襄陵洪洞浮山趙城太平岳陽曲沃翼城汾西霍州志
胥同觜參

靈石在平陽汾州間

潞安府通考上黨入輿鬼二度握天樞上黨入輿鬼三
度而圖書編明一統志潞安參井分野

長治志上黨入輿鬼潞為昴畢分野

長子星野附府

屯留志觜參分野

襄垣志昴畢分野

潞城志鬼宿分野

黎城志濁漳之北為畢之分野

壺關平順星野附府

汾陽志汾古西河地冀州之域春秋以晉屬參非專以參言汾也及秦以西河隸太原郡太原昴畢分星也亦得繫之畢分唐以西河屬河東郡河東即平陽觜參分星也亦得繫之參分史記謂秦地與天官東井與鬼分野其界有西河則西河又得繫之井分矣山西通志謂參觜實沈之次於辰為申晉魏之分也而井宿附焉晉天文志曰自畢十二度至井十五度為實沈分野今考

汾地北距太原界七十里得不分星畢乎南距平陽界一百二十里得不分星參乎西距陝西吳堡界二百九十里吳堡秦接西河分也得不分星井乎按宋史天文志參星十度右足入畢十三度又參九游星在玉井東北玉井四星在參西左足下東井南軍市十三星在參東西觀其鈎連曲屈之狀夾維環拱之勢是汾雖主參而得於畢者十僅一之餘得於井者十則二之餘又不得以疆界遠邇為概也左氏子產曰堯遷實沈於大夏

主參臺駘能業其官顓頊嘉之封於汾州是臺駘汾神也實沈參神也此舊志所引然止屬參野殊未深考矣蓋汾在文雖屬參度而下入井分二之餘兼畢分一之餘焉論斯允當歟地輿綜要平陽固屬觜參太原亦屬觜參其註汾州則專主參而不並及觜汾之天文以參為主即有所雜亦惟觜多而畢井則不必牽合也

平遙介休孝義臨縣石樓寧鄉志胥同參

永寧志太原上黨乃昴畢分野而永寧實攝其後故居
昴畢之次

大同志昴畢為趙之分野大同居趙北鄙當為昴畢分
野

懷仁山陰應州渾源州志胥同昴畢

靈邱志靈邱入井二度隸屬大同之東距恒山不遠則
靈邱當占昴畢無疑

廣靈廣昌陽高天鎮志胥同昴畢

朔平府志平介太原大同間分野當從昴畢井三星而胃得馬牧之氣且趙之分野當兼胃星

朔州馬邑同昴畢左雲平魯附府

寧武府當同朔平偏關神池五寨附府

澤州志按參晉星也韓趙魏衛之界晉土也然亦大畧耳班固配十二次自胃七度中昴至畢十一度為大梁辰在酉趙之分野屬冀州自危十六度中室畢至奎四度為姬訾辰在亥衛之分野屬并州陳卓京房張衡並

云昴畢趙冀州營室東北衛井州故太原候室壁上黨
應候昴畢唐一行以山河兩戒二十八宿度數配地絡
之南北陰陽昴畢間為天街陰陰國陽陽國元命苞曰
昴畢散為冀州立為趙國上黨趙之分地秦趙遇於長
平太白食昴未嘗食參古不以昴建上黨上黨屬晉也
晉初不封上黨黼參不臨上黨非昴其孰主之高平為
上黨地長平之遺跡昭然故高平當屬昴而畢在天街
南陽國不占觜觿距參一度為虎首畫野在王屋以東

王屋陽城之屏虎有首有身不可以參先觜觿故陽城
當屬觜觿此可以斟酌澤郡之星次分合矣

高平陽城陵川沁水志胥同觜參

蒲州府志晉分觜參屬實沈之次月令孟春之月昏參
中仲秋之月旦觜觿中晉天文志又曰河東入張一度
屬鶉火之次堯典仲春星鳥月令季春之月昏七星中
孟冬之月旦七星中 鶉首之次秦分鶉火之次周分
三河

臨晉虞鄉猗氏萬泉滎河志胥同觜觿參

遼州志觜參井之分

和順榆社志胥同觜參

沁州志汪宗魯星野辨沁志舊引晉書於辰在亥乃參之辰在申以沁視參不隔酉戌二宮乎詳考統志山西五郡二州並載分星甚晰沁獨不載分野蓋以向隸上黨略之也今即視上黨分野自應屬參井乃武鄉志引文獻通考上黨入輿鬼三度握天樞上黨入輿鬼二度

而晉書亦云入鬼二度然則一沁也以為昴畢又以為參井又以為室壁又以為輿鬼將何適從乎竊意姬訾在亥之說既不可從即昴畢間亦恐於沁無涉何也昴畢所屬之冀東南北郡邑甚廣且極於邊方其西惟太原定襄雲中五原及上黨耳今沁雖近上黨其地稍折而南而昴畢微帶冀之西隅故疑其無涉應確從參井之分

沁源武鄉志胥同畢觜

平定志平定當太原東正定西為參井昴畢之交

壽陽孟縣樂平志胥同參井

忻州志畢觜參井之次

定襄志昴畢之次

靜樂志井次入陝其麗參者較多參井為近

代州志冀州實沈之次申宮晉分參井分野參十度半井三十四度井度不盡於晉半入陝太原屬參井之交則代屬參分參六星西脚入玉井則西入玉井者正代

州星野之分度五臺志明劉基分野太原入畢初度而五臺得六度則屬畢無疑

繁峙崞縣志胥同參井

保德志保德在昴十度之末畢初度

河曲星野附州

解州志觜參分野

安邑夏縣志胥同實沈之次

平陸志平陸魏地分野近觜觿參晉書河東入張一度

芮城志參分野踰

絳州志參實沈之次

聞喜河津胥同參井

稷山志史記昴畢屬冀州而稷山屬魏地又在參參之分

絳縣垣曲志胥同參參

吉州志參參分野

鄉寧志參參分野

隰州志皆參分野

蒲縣志參分野

大寧志皆參分野

永和志附州

古典

堯時著推術設部首演紀於虛之初建困敦而部大呂
易乾鑿度云堯以甲子天元為推術注云以甲子為
部首起十月朔竹書紀年云堯元年丙子故隋袁先生

云堯以甲子受命四十九年得上元第一紀甲子天正十一月庚戌冬至至仁壽甲子凡八經上元然考堯以戊寅即位而非丙子四十七年始得天正甲子是年冬至日在虛一度為演紀之端在位百年禪舜五十年起戊午自天正甲子至開元甲子三千一年日退三十八度四千一百二十八分日至在斗十度下至宋慶厯四年甲申積凡三千三百二十二年日退四十二度五十八分是歲冬至在斗五度以歲差考之每七十八年而

差一度則堯甲子歲日至在虛一度於是中星皆正皇甫謐邵堯夫皆以堯為甲辰即位舜以壬午堯在位七十載皆誤

帝堯稽冀以正月訪桐以定閏錄龜字而施之是曰龜厯伏滔述帝功德銘壺書龜厯之文蓋堯厯曰龜厯述異記陶唐世越裳獻千歲神龜背有文記開闢以來錄為龜厯唐事始言因軒轅靈龜有圖作龜書也

堯典岵夷禺鐵在遼西南交故交州西隴西漢之西縣

其地高望柳谷幽州朔州易州王肅謂義仲義叔和仲和叔居京師而統之有時述職疏謂在京都而遙領

帝堯七十有三載丙辰舜乃齊七政 金履祥前編按堯典在璿璣玉衡以齊七政蓋以玉為機以象天之轉運以璿珠飾之以象星辰之位次以玉為橫簫推其分度時節以窺天而與璣合義和之法至是益密後世渾天儀象蓋其法也

朱子曰渾天之術南北極持其兩端其天與星宿斜而回轉此必古有其法遭秦而滅漢武時洛下閎鮮于妄人始經營量度之宣帝時耿壽昌始鑄銅為象宋錢樂又鑄銅作渾天儀衡長八尺孔徑一寸璣徑八尺圓周二丈五尺強轉而望之知日月星辰之所在即璿璣玉衡遺法也儀禮歷象篇曰渾天儀唐貞觀中李淳風為之開元時浮屠一行梁令瓚又為之宋張思訓創為蘇頌更造其法尤密置渾儀於上以仰觀置渾象於下

以俯視樞機輪軸隱於中以水激輪則儀象皆動不假人力

虞書曰在璇璣玉衡以齊七政考靈曜云分寸之晷代天氣生以制方員方員以成叅以規矩昏明主時乃命四星觀玉儀之游鄭康成謂以玉為渾儀春秋文曜鉤云唐堯即位義和立渾儀此則儀象之設其來遠矣
實沈為陰陽官

堯歷象立其數舜璣衡立其器璿生於淵月魄終焉陰

精之純也王生於山虹氣藏焉陽精之純也璣運於上以璿為之衡望乎下以玉為之取順乎陰陽之運也說苑璿璣謂北辰勾陳樞星以其魁杓所指二十八宿為吉凶禍福列舍盈縮之占

七政日月五緯也堯正經星舜齊緯星所以相濟器出於人故占之以齊七政於上數出於天故推之以正人時於下或以為斗七星者非

大戴禮虞夏之歷建正於孟春 孔子曰吾得夏時焉

今傳夏小正書

禹命伯封叔及昭明作衍歷歲紀甲寅鈴天地施敬授
人時人時是重故建首寅而後冬夏正春斤不升山夏
畧不趣淵以宛生長而專民力乃布令曰九月除道十
月成梁故其時儆曰收而場功待乃畚楬營室之中土
功其始火之初見其於司里速畦墪之就而執成男女
之功故生不失宜而物不失性人不失事夫得時而萬
化財成焉昔孔子觀夏道得其四時之書者是矣

釐公五年正月辛亥朔旦冬至殷歷以為壬子距成公七十六歲是歲距上元十四萬二千五百七十七歲得孟統五十三章首故傳曰五年春王正月辛亥朔日南至八月甲午晉侯圍上陽童謠云丙子之辰龍尾伏辰初服振振取號之旗鶉之賁賁天策惇惇火中成軍號公其奔卜偃曰其九月十月之交乎丙子旦日在尾月在策鶉火中必是時也冬十二月丙子滅虢言歷者以夏時故周十二月夏十月也是歲歲在大火故傳曰晉

侯使寺人披伐蒲重耳奔狄董因曰君之行歲在大火
後十二年釐之十六歲歲在壽星故傳曰重耳處狄十
二年而行過衛五鹿乞食於桀人桀人舉由而與之子
犯曰天賜也後十二年必獲此土歲復於壽星必獲諸
侯春秋成公即位十八年子襄公午立襄公二十七年
距辛亥百九歲九月乙亥朔是建申之月也二十八年
距辛亥百一十歲歲在星紀三十年歲在娵訾三十一
年歲在降婁是歲距辛亥百一十三年二月有癸未上

距文公十一年會於承匡之歲夏正月甲子朔凡四百四十有五甲子奇二十日為日二萬六千六百有六旬故傳曰絳縣老人曰臣生之歲正月甲子朔四百四十有五甲子矣其季於今三之一也師曠曰卻成子會于承匡之歲也七十三年矣史趙曰亥有二首六身下二如身則其日數也士文伯曰然則二萬六千六百有六旬也

漢龍門司馬談著萬歲曆

後魏上黨李業興著壬子元厯甲子元厯七曜厯數七
曜義疏戊子厯殷甲寅厯甲厯衍數黃帝辛卯衍數九
宮行基厯貞觀初直太史局太原李淳風上言今靈臺
候儀是魏代遺範觀其制度疎漏實多臣按虞書稱舜
在璿璣玉衡以齊七政則是古以渾天儀考七曜之盈
縮也周官大司徒職以土圭正日景以定地中此亦據
渾天儀日行黃道之明証也暨於周末此器乃亡漢孝
武時洛下閎復造渾天儀事多疎闕故賈逵張衡各有

營鑄陸續遞加修補或綴附經星機應漏水或孤張規
郭不依日行推驗七曜並循赤道今驗冬至極南夏至
極北而赤道定當於中全無南北之異以測七曜豈得
其真黃道渾儀之闕至今千餘載矣太宗異其說令造
之至貞觀七年成其制以銅為之表裏三重下據準基
狀如十字末樹鼉足以張四表焉第一儀名曰六合儀
有天經雙規金渾緯規金常規相結於四極之內備二
十八宿十日十二辰經緯三百六十五度第二名三辰

儀圓徑八尺有璿璣規月遊規列宿距度七曜所行並
備於此轉於六合之內第三名四游儀元樞為軸以連
結玉衡游筩而貫約規矩又元樞北樹北辰南距地軸
傍轉於內玉衡在元樞之間而南北游仰以觀天之辰
宿下以識器之晷度時稱其妙又論前代渾儀得失之
差著書七卷名法象志奏之太宗稱善置其儀於凝暉
閣

晉高祖時司天監太原馬重績始更造新厯不復推古

上元甲子冬至七曜之會而起唐天寶十四載乙未為上元用正月雨水為氣首初唐建中時術者曹士蒨始變古法以顯慶五年為上元雨水為歲首號符天厯然世謂之小厯祇行於民間而重績乃用以為法遂施於朝廷賜號調元厯然行之五年輒差不可用而復用唐崇元厯

王朴欽天厯法世罕傳歐陽修嘗問於著作佐郎晉城劉義叟義叟求得欽天厯經四篇然後朴之厯大備義

史好學知書史尤通於星厯嘗曰前世造厯者其法不同而多差至唐一行始以天地之中數作大衍厯最為精密後世善治厯者皆用其法惟寫分擬數而已至王朴一能自為一家朴之厯法總日躔差為盈縮二厯分月離為遲疾二百四十八限以考衰殺之漸以審朏朧而朔望正矣校赤道九限更其率數以步黃道使日躔有常度分黃道八節辨其內外以睽九道使月行如循環而二曜協矣觀天勢之升降察軌道之斜正以制食

差而交會密矣測岳臺之中晷以辨二至之日夜而軌漏實矣推星行之逆順伏留使舒亟有漸而五緯齊矣然不能宏深簡易而徑急是取至其所長雖聖人出不能易也李淳風著晉書天文志劉義叟著新唐書天文五行志胥史蘓董因之流也

山西通志卷二